

दिनांक : 13.04.2026

समय : 18.45 बजे

- प्रधानमंत्री नरेन्द्र मोदी कह्यो—“नारी शक्ति वंदन” कानून ऊं लोकतंत्र और मज़बूत बणेलों
- मुख्यमंत्री भजनलाल शर्मा नौजवानों ने मज़बूत बणावण रो राज्य सरकार रो संकल्प दोहरायों
- एसीबी जल जीवन मिशन घोटाला रा 10 आरोपितों रे खिलाफ़ चार्जशीट पेश कीनीं
- मौसम विभाग ई साल चौमासा मांय सामान्य ऊं कम बिरखा व्हेवण री शंका जतायीं

000

प्रधानमंत्री नरेन्द्र मोदी कह्यो है के भारत री महिलावां हिम्मत, खुद माथे भरोसा अर मेहनत रे पाण लगातार नुवा मुकाम हासिल कर रही हैं वे आज नई दिल्ली मांय नारी शक्ति वंदन सम्मेलन मांय बोल रह्या हां श्री मोदी कह्यो के भारत 21वीं सदी मांय महिलावां ने मज़बूत बणावण ने समर्पित मोटो फ़ैसलो लेवण वाळो हैं वे कह्यो के संसद ऐडो इतिहास बणावण ने जा रही है, जिण मांय गुजर्या ज़माना अर आवता बगत री उम्मीदां पूरी करी जावेलों प्रधानमंत्री कह्यो के लोकतंत्र मांय महिलावां सारु आरक्षण घणो ज़रुरी हैं श्री मोदी कह्यो के महिलावां री भागीदारी, लोकतंत्र ने मज़बूत करे है अर पंचायती राज संस्थावां महिलावां री अगुवाई री बेहतरीन मिसाल हैं श्री मोदी कह्यो के मौजूदा दौर मांय 14 लाख ऊं बत्ती महिलावां स्थानीय सार्वजनिक निकायां मांय सेवा दे रही हैं

000

मुख्यमंत्री भजनलाल शर्मा बालोतरा ज़िला रा पचपदरा मांय बणाया जा रह्या तेल साफ़ करण रा कारखाना रो दौरों कर र हिफ़ाज़त ऊं जुडी अर दूजी व्यवस्थावां रो आज जायज़ो लीनों वे प्रधानमंत्री नरेन्द्र मोदी रा 21 अप्रैल ने प्रस्तावित दौरा री तैयारियां री जाणकारी लीनी अर ज़रुरी हुकम दीनां ई मौके श्री शर्मा कह्यो के आ रिफ़ाइनरी प्रदेश रो माथो ऊंचो करण वाळी है अर इण रे चालू व्हे जावण ऊं राज्य रा आतूणी हलका समेत आखा प्रदेश री माली हालत मांय मोटा बदलाव आवेलों मुख्यमंत्री कह्यो के प्रधानमंत्री खुद ई खास परियोजना माथे लगातार निगराणी राख रह्या हैं

.....

इण ऊं पैली मुख्यमंत्री प्रधानमंत्री री सभा री प्रस्तावित ठौड़ रो दौरों कर र अहलकारां ने ज़रुरी हुकम दीनां

000

मुख्यमंत्री भजनलाल शर्मा कह्यो है के राज्य सरकार नौजवानों ने मज़बूत बणावण अर वां रा सपना सांचा करण सारु पूरा मन ऊं काम कर रही हैं वे आज जयपुर मांय राख्यी ज्या 'माय भारत बजट क्वेस्ट-2026' कार्यक्रम मांय वर्चुअल तरीका ऊं बोल रह्या हां श्री शर्मा बतायो के प्रदेश मांय आवता पांच साल मांय चार लाख सरकारी अर छह लाख गैर-सरकारी नौकरियां दी जावेलों वे सरकारी नौकरी सारु ली जावण वाळी भर्ती परीक्षावां रा पेपर लीक व्हेवण रे खिलाफ़ करी ज्यी कार्यवाही रो जिक करता थकां कह्यो के हाल ताई 400 ऊं बत्ता आरोपितों ने जेल भेज दिया ज्या हैं मुख्यमंत्री कह्यो के नौजवानों ने खुद रा काम-धंधा सरु करण मांय मदद सारु 50 लाख ऊं एक करोड़ रुपया ताई रा बिना ब्याज रा कर्ज दिया जा रह्या हैं ई मौके मुख्यमंत्री नौजवानों ऊं नौकरी करण वाळां री बजाय नौकरी देवण वाळा बणबा सारु कह्यो

000

आयुष्मान भारत प्रधानमंत्री जन आरोग्य हैकॉथॉन-2026 सारु नाम मंडावण रो आज आखिरी दिन हैं राष्ट्रीय स्वास्थ्य प्राधिकरण कानी ऊं राख्यी ज्या ई कार्यक्रम मांय भाग लेवण सारु हाल ताई दो हजार छह सौ ऊं बत्ता लोग नाम मंडा लीना हैं ई हैकॉथॉन रो मकसद स्वास्थ्य सेवावां मांय डिजिटल समाधान री खोज करणो अर क्लेम प्रक्रिया ने आसान बणावणो हैं इण मांय सिरकत करण वाळां सारु आज तीन दिन री मास्टरक्लास सरु करी ज्यी आ होड़ 8 अर 9 मई ने बेंगलुरु मांय पूरी व्हेलां

000

भ्रष्टाचार निरोधक ब्यूरो जल जीवन मिशन घोटाला मांय पकड़ी ज्या रिटायर्ड आई.ए.एस. अहलकार सुबोध अग्रवाल ने आज अदालत मांय पेश कीनो, जठे ऊं वां ने दो दिन सारु पुलिस हिरासत मांय

भेज दियो ज्यो इण ई मामला मांय ए.सी.बी. 10 आरोपितां रे खिलाफ अदालत मांय चार्जशीट ई पेश कर दीनीं ए.सी.बी. रे मुजब ई मामला मांय दूजा आरोपितां रे खिलाफ जांच चाल रही है अर फरार तीन और आरोपितां री गिरफ्तारी सारू दबिश देवण सागे वां री संपत्तियां कुर्क करण री कार्रवाई सारू कर दीरीजी हैं

000

पुलिस महानिदेशक राजीव शर्मा कह्यो है के प्रदेश मांय कानून-व्यवस्था ने मजबूत बणावण अर साइबर अपराधां माथे काबू करण माथे पुलिस रो खास ध्यान हैं वे आज जोधपुर मांय खबरनवीसां सागे बातचीत कर रह्या हां डीजीपी बतायो के राज्य रा हर ज़िला मांय साइबर थाणा खोल दिया ज्या हैं राजीव शर्मा कह्यो के पुलिस ने मौजूदा दौर री चुनौतियां रो सामो करण सारू तैयार करण बाबत् जवानां ने खास सिखावण दी जा रही हैं

.....

000

राजस्थान पुलिस स्थापना दिवस रा सिलसिला मांय काल ऊं तीन दिन रो जळसो सारू व्हेलां काल जयपुर रा ऐतिहासिक अल्बर्ट हॉल सामी सिंज्यां 7 ऊं सवा आठ बज्यां ताई राजस्थान पुलिस रो बैंड कार्यक्रम पेश करेलां ई दौरान अल्बर्ट हॉल ने ई सोहवणी रोशनी ऊं सजायो जावेलां

000

भारत रत्न डॉ. भीमराव अंबेडकर री जयंती रा सिलसिला मांय राज्य मांय भांत-भांत रा कार्यक्रम राख्या जा रह्या हैं सवाईमाधोपुर ज़िला मांय आज साफ-सफाई अर सामाजिक समरसता रा कार्यक्रमं सागे बाबा साहेब री सोच माथे आधारित संगोष्ठियां राखी ज्यीं काल खास समारोह रे दौरान संविधान री प्रस्तावना बांच र शपथ दिरायी जावेलां ई सागे ई विद्यार्थियां सारू निबंध लेखन अर सवाल-जवाब री ऑनलाइन होडां राखी जा रही हैं ई सिलसिला मांय हनुमानगढ़ ज़िला रा बशीर गांव मांय आज राखी ज्या कार्यक्रम मांय न्यारा-न्यारा हलकां मांय चोखो काम करण वाळां रो मान करी ज्यो ज़िला मांय काल शोभायात्रावां निकाळी जावेलां बाड़मेर मांय ई काल जन-जागरण रैली निकाळबा सागे ज़िला स्तर रो प्रतिभा सम्मान समारोह राख्यो जावेलां

000

मौसम विभाग ई साल चौमासा मांय सामान्य ऊं कम बिरखा रा आसार जताया हैं महकमा कानी ऊं आज जारी करी ज्या अनुमान रे मुजब ई दफा चौमासा मांय बिरखा सामान्य ऊं 8 फीसदी कम रेहवण सागे अलनीनो सरीखा हालात पैदा व्हेवण री संभावना हैं ई बीचे प्रदेश मांय अब तेज तावडो पड़बा लाग्यो हैं लारला चौबीस घंटां मांय उनतालीस दशमलव चार डिग्री सेल्सियस तापमान सागे बाड़मेर प्रदेश री सब ऊं उन्नी ठौड़ रह्यो जैसलमेर, जोधपुर, कोटा अर जालौर समेत बारह ऊं बत्ता ज़िलां मांय पारो 37 डिग्री सेल्सियस ने पार कर ग्यो कम-ती-कम तापमान ई बीस डिग्री सेल्सियस ऊं ऊंचो दर्ज कर्यो जा रह्यो हैं मौसम केंद्र जयपुर रा निदेशक राधेश्याम शर्मा बतायो के आवता 4-5 दिन ताई पारो तीन-चार डिग्री सेल्सियस और चढ़बा रा आसार है अर राज्य रा आतूणी हलकां मांय कठे-कठे तापमान चाळीस डिग्री सेल्सियस ने पार कर जावण री संभावना हैं

000

डीग ज़िला रा सांवई खेड़ा हलका मांय सांवई खेड़ा डिप्रेशन लिफ्ट योजना' रो काम करीब तीन चौथाई पूरो व्हे ग्यो हैं ज़िला कलेक्टर मयंक मनीष बतायो के मार्च 2025 मांय सारू करी ज्या काम ऊं सामई खेड़ा मांय भेळो व्हेवण वाळो बत्तो पाणी बाहर निकाळ्यो जावेला, जिण ऊं करीब अढ़ाई हजार बीघा री खेतीहर ज़मीं मांय पाणी नी भरेलां

000

श्रीगंगानगर ज़िला री सात नगरपालिकावां री वोटर लिस्टां रो मजमून छाप दियो ज्यो हैं काल संबंधित वाडां अर मतदान केन्द्रां माथे निर्वाचक नामावलियां बांची जावेलां आं माथे आपत्तियां अर दावा 27 अप्रैल ताई पेश कर्या जा सकेलां खास अभियान रा तैत 19 अर 26 अप्रैल ने वोटर लिस्टां मांय नाम जुड़वावण या वां मांय बदलाव रा काम कर्या जावेलां 3 मई ताई दावां अर आपत्तियां रो निपटारो कर्यां पाछे 8 मई ने वोटर लिस्टां आखिरी तौर ऊं छापी जावेलां

000